

## ԱՐԵՒՄՈՒՏՔ

Գրեց՝ ԿՈՍՏԱՆ ԶԱՐԵԱՆ

## ՀԱՅՐԵՆԻ ԵՐԿՐԻ ԶԱՅՆԸ

## GIARDINI:

Երբ ձերմակ նաւերը բախւում են կղզիին՝ պարտէզը դեղին հեծկլտոց է հանում. տերեւները դանդաղօրէն վայր են ընկնում եւ մերկացած ճիւղերը մետաղի նման փայլում են:

Գեղեցիկ այդ մահի հետ ամբողջ վէնետիկը սարսուռում է:

Գարիբալդի արձանը՝ պղնձէ մի ժայռի վրայ կանգնած՝ ծառերի կատարին փերթոյ յիշատակներ է փնտռում:

Լագունայի մակերեսին՝ երփներանգ լոյսերի սիմֆոնիա:

Ջրէ այդ դաշտում կղզիներ են ման գալիս: Սան Սիբուրօն՝ խենթերի կղզին՝ փակ իր պատուհանների ետեւ տենդ եւ անհանգստութիւն է կուտակում: Յետոյ ոլորւում են հեղուկ ձամբաները՝ պսպղուն եւ մինակեաց, բազմաթիւ սիւներով եղբրւած: Ու ահա Սուրբ Ղազարը կամաց կամաց սուզւում է ճառագայթների մէջ: Բիւզանդական իր դանդակատան շուրջը ձերմակ թռչուններ են պտտում եւ կարմիր իր չէնքերից մութ շուքեր են վայր ընկնում:

Հայ աղջկայ մոխրագոյն մեծ աչքերում հեքեաթ է սառել: Երբ փորձում է խօսել՝ ձայնը քիչ դողում է: Ձեռքի փոքրիկ պայուսակը սեղմում է կրծքին. վիզը ծռում է հետաքրքրուած թռչունի նման. մերթ ընդ մերթ կանգ է առնում. կարծես ականջ է դնում վայր ընկնող տերեւներին:

Վենետիկը եւ իր աշունը մտել են երակներին մէջ հին գինիի նման:

— Դեռ պատանի, ահա այստեղ, Վազների այս կիսանդրիի մօտ գալիս ժամերով նստում էի: Այս պարտէզի ամէն մի ծառը ինձ ծանօթ է. — մէնչեւ իսկ ձմեռը, երբ Լիգուից մոխրագոյն մշուշ է սողում, ես գալիս երազում էի այստեղ:

Սօսում է: Երաժշտական իր ձայնի ման-

կական շեշտը քաղցր է եւ մտերիմ:

Մտերիմ:

Կանանց աչքերում մենք մեր մօր նայուածքն ենք փնտռում: Այն նայուածքը, որին մենք հանդիպել ենք օրօրոցում եւ որ կորցրել ենք կեանքի դաժան օրերում:

— Ասեմ... Հոռում ման էի գալիս հարածի նման: Աղջի ի՞նչ ունես, — ասում էր մայրս: — Իսկ ես չէի իմանում ինչ ունես: Մի օր էլ ծածուկ քեզ այդ բացիկը դրեցի. իմանա՛ս՝ ինչքան վախեցայ, ինչքա՛ն վախեցայ...

Ծառերի մէջ բոց է չրջում:

Այդ կրակը փունջ փունջ վայր է ընկնում ջուրի մէջ, սուզւում է խորը, կարծես այնտեղ յատակում խարոյկ են վառել:

Ձեռքը առել եմ ձեռքիս մէջ, աչքերը աչքերիս մէջ:

— Ահա այս նստարանի վրայ ոչ ոք չկայ. նստե՛ք:

— Յետոյ Ռաֆիննայում, հինաւուրց այդ քարերի մօտ, այնպէս էր ինձ թւում, որ մէկը ինձ եպստում է: Ո՞վ է, Տէր Աստուած, ո՞վ է, մտածում էի... Եւ մի օր էլ նամակդ առի... Քանի անգամ եմ կարդացել... Կան բաներ, դիտես, որ դժուար է բացատրել. զգացումներ են որ կլանում են քեզ. գալիս են՝ չես իմանում որտեղից, գալիս են մրրիկի նման եւ ամէն ինչ տակնուվրայ են անում...

— Ես սիրում եմ խօսելու այդ ձեւը եւ սիրում եմ աչքերդ...

— Գիւղում, երբ զրօսանքի չէի գնում, նստում էի դաշնամուրիս առջեւ: Ժամերով... գիւղի ծերուկ քահանայի տան դաշնակը: Ինքը գալիս երբեմն նստում էր անկիւնում, լուռ ու մունջ, շուքի նման: Լա՛ւ է՝ ասում էր՝ ա՛հ ինչ լաւ է, փոքրիկ իմ օրիորդ... Իսկ իմ ուշքս ու միտքս ուրիշ տեղ էին, ո՛ւր էին. գիտէի եւ չգիտէի...